

皇朝經世文續編

皇朝經世文續編目錄

卷七十六兵政十五山防

增刻三省邊防備覽序

保山縣城內回民移置官乃山相安情形疏

致辰沅永靖道

招撫流亡示

擬設法保護屯民夾片

請移駐巡檢分防疏

查明角子山地方險阻酌擬練軍駐紮疏

移設縣丞都司及建置事宜疏

卷七十七兵政十六海防上

請改大鵬營制疏

尖沙嘴官涌添建礮臺疏

覆奏察看虎門排練礮臺疏

會奏銷化煙土已將及半情形疏

附片

附奏東西各洋越窺夷船嚴行懲辦片

擬諭喚咭喇國王檄

覆奏曾望顏條陳封關禁海事宜疏

密陳定海惠清片

密陳夷務不能歇手片

會同驅諸夷船稟

征夷船進口硝磺稅銀議

張鵬飛

林則徐

胡林翼

瑞璋

吳大澂

衛榮光

邊寶泉

衛榮光

林則徐

林則徐

林則徐

林則徐

林則徐

林則徐

林則徐

林則徐

林則徐

胡興仁

胡興仁

卷七十八 兵政十七 海防下

道光洋艘征撫記上

道光洋艘征撫記下

籌海篇上

籌海篇下

卷七十九 兵政十八 塞防

請招募撤戶防堵番賊疏

騰 剿辦 越廳邊外野夷疏

奏為勘平聯對善後事竣漢兵藏兵一律凱撤疏

奏為田州改土歸流通籌全局疏

請移設綠營疏

報明南路勘番情形疏

北路中路開山情形疏

番社就撫布置情形疏

奏為岷州林口土民自請改土歸流疏

條陳粵西土田州土目事宜

上粵督平治黎匪條陳

防黎示

會奏黎匪勘撫事宜疏

奏臺灣各路生番歸化并開山招撫情形疏

卷八十 兵政十九 苗防

道光湖粵平徭記

魏源

魏源

魏源

魏源

易棠

林則徐

駱秉章

劉長佑

岑毓英

沈葆楨

沈葆楨

沈葆楨

譚鍾麟

謝光綺

關名

王之春

張之洞

吳大澂

劉銘傳

魏源

八排兵事攷

平徭議

治徭

斷龍

覆陳漢苗土司各情形疏

總陳湖南苗疆情形疏

遵議江華縣撫徭斬章疏

奏陳苗疆善後事宜片

招撫探目請 予土職各緣由疏

卷八十一兵政二十勦匪上

議覆葉紹本條陳捕盜事宜疏

論粵西賊情兵事始末

弭盜策

致魏將侯

與大府論會匪書

請通飭修築碉堡啟

上呂方伯啟

致督脩碉堡各員紳書

論全楚邊防

諭團練示

上中丞切要事宜

復周鹽道四條議

湯彝

陳起詩

陳起書

陳起書

賀長齡

賀熙齡

李明輝

林肇元

岑毓英

林則徐

嚴正基

周琛

胡林翼

胡林翼

胡林翼

胡林翼

胡林翼

魁聯

魁聯

魁聯

魁聯

魁聯

代劉侍郎與貴東道書

檄鳳翔淮徐滁泗宿海八府屬文代作

卷八十二兵政二十一 剿匪中

上琦中堂書

定海兵亂記

會匪紀略

會匪紀略書後

又書會匪紀略後

陳河南擒匪情形疏

現籌剿辦川北巨股調集各軍分途前進情形疏

奏為生擒逆首並剿滅髮逆巨股疏

郭嵩施
魯一同

徐鼎

李尚暉

孫衣言

孫衣言

孫衣言

胡林翼

駱秉章

駱秉章

皇朝經世文續編卷七十六

兵政十五 山防

增刻三省邊防備覽序

上海葛士藩子潯輯

張鵬飛

嘗讀賈長沙策惜其卓識名論思患豫防竟阻於絳灌不之用至武帝時其策果行終漢世果無復藩國之患設使當文帝時早用之七國不至以從逆終後之人必且議書生過激之論徒託於虛矣豈知仁人君子之用心第求國計民生陰受其福詎忍幸事變而沽己名哉今讀嚴樂園方伯三省邊防備覽深嘆其飭武籌邊用心有合於長沙惜乎行之未逮齋志以沒不能不重錄之以廣其傳也三省者何陝西四川湖北也其邊境毗連犬牙相錯實為坤輿之奧區高山長林綿亘千數百里彌二省覺竟日不見人煙附近省民利其地廣賦輕極負而至佃山結屋墾土開荒土著目之曰新民其地鹽米食物較他省饋減十之五失業游民與避饑棚民往往以此為逋逃數游民有資則私販趨利折本則羣聚為非賭竊拐騙無所不至其為棚民者扶老携幼盈千累百擇肥勒食一餐石米伊自號曰吃大戶大戶目伊曰挨兵供之則慮力有不能拂之則恐禍且立至其地距縣治動輒一二百里民不堪二者之擾稟官捕治陝追則遶之蜀蜀追則遶之楚路歧如麻人竄似梭咫尺隔省彼此守令均有鞭長莫及之嘆此緝捕之所以不能立獲也然此猶其小者也其尤點者有紅錢黑錢大五帽頂諸名色其結黨數十人或數百人羽翼既多各習拳棍刀槍以資捍護或夜劫富民或晝搶場鎮先約過兵役追捕不許散黨如事急眾議散去始各逃竄如未議一二人先散者眾共戮之以此其勢既精其黨亦固小則拒捕抗官大則揭竿謀逆甚或棋布要害公然為犄角之勢官吏銳志撲誅多用兵則艱於轉餉少用兵則莫制鴟張致煩士馬戡定經年累歲然後以次削平之稽之五代唐宋不勝枚舉姑以起滅於勝國者約舉之以概其前可也明成化時劉通蠢動於房縣其黨李原王洪王彪擾及川陝藉非項嘉興忠討之原陽城傑撫之滋擾直不知底止正德時保甯賊藍廷瑞自稱順天王邸本恕自稱剗地王十萬餘眾延蔓川陝湖廣藉非洪錢塘鍾彭世麟設計誘擒其蹂躪更不堪言矣自時厥後在陝西則有何冕嘯聚西鄉星子山淡文省盤踞金州王莽山李三負固紫陽高峰寨在四川則有劉烈為盜於保甯曹甫於掠於營達喻思順竄擾於通巴在湖廣則有茶毒鄖西之楊文政巢窟房縣之王斌盜聚巴東之黃中所在掠地劫民大肆屠戮哀我子遺既無牛種自廢耕耘千里炊絕斗米千金無論被搶之地元氣盡耗即附近州縣亦疲於奔命固圉弗遑矣其最勞撻伐者則崇禎時之李自成張獻忠當二賊乘亂竊據

於三省也其時殺戮之慘從古未聞幸賴大兵弔伐元惡伏誅而流毒餘氛處處劫掠陝有劉二虎小紅狼分踞興安甯羌一帶川有姚黃十三家盜弄於保順連變一帶湖廣有郭儀旗馬黨塔楊明啟竄屯於房竹大富一帶十數百里之提封莫非鴟獍縱橫之所直至康熙二三十年漸取其類而殲稱凡此皆明之餘毒見於史志可考者也此外旋起旋撲為害不烈者尚不能縷指述矣我朝混一函夏以德綏民薄海內外來享來王間有一二梗化天兵所指無不如摧枯拉朽獨此三省邊疆在嘉慶初則有白蓮教匪之變最稽天討當時合滿漢軍數十萬剿撫五六年之久不免奏功卒恃龍太守景潯壓清野議始能制奔豕之命未及一年非逃即擒而大慙生縛於闕下屈指底定以來迄今念有餘年矣痛定思痛不能不為愀然吹簫之謀凡以談虎色變身受其害最深也聞嘗求此三省邊境所以治少亂多之故說者謂狐兔易於踰伏攻之難而守之易其實揆厥所由總因防禦日弛撫字不動之所致然則曲突徙薪烏可不早為計耶今雖邊烽久熄民氣恬熙而山深箐密向為匪人久踞之區保無有漏網遺孽冷灰復燃乎保無有類木由孽旁生側發乎是以今上御極之年大吏奏請仿前明專設鄣撫例以總其成以資彈壓時三省督撫條奏改陝西鞏昌縣丞為撫民通判四川湖北各要隘均更定有差未雨綢繆誠有鑒前此黨聚竊發艱難百戰尚未能正本塞源也余時山居聞之喜甚即欲輯教匪滋事始末彙成一書以為殷鑒徒以冗務纏縛卒至未果不意方伯時作行人竟先為之睹窗披覽見其自輿圖以至藝文洪纖畢具直如家留侯之借箸而謀馬伏波之聚米為山大肯總在因地設防用垂久遠所謂布置在乎審勢權變貴乎因時洵為安邊大猷也第其中有二三錯謫搜採未備者不辭固陋竊就見聞所及為之分訂分增於其後誠使莅乎此者果能酌古準今遵其防撫或如龔遂之治渤海或如張綱之治廣陵不過賢能數十員分布其間可以安坐而治矣昔人云亂之既成數名將制之而不足亂之未成一循吏撫之而有餘安見古今人不相及耶

保山縣城內回民移置官乃山相安情形疏

林則徐

竊臣等於上年會奏永昌善後案內議請添移營汛弁兵聲明保山縣轄之官乃山因安插回民二百餘戶尚有陸續前來者擬添兵五十名連原駐之三十名派一把總帶領以資彈壓等情已蒙 勅部覈議覆准在案被時回民移居未久尚須細察情形未敢以試辦之章程遽作常行之定準節經諄飭永昌府知府張亮基就近督縣加意撫綏認真彈壓計上年四月安置之後至今已越一年疊據稟報該回民二百餘戶在官乃山銀種為生均極守分安業堪以永遠居住等情臣等查此案移置之由因道光二十五年九月間保山城內回民被該處七哨匪徒挾仇殘殺一次迨二十七年甫經招復又於十二月初一日

因哨匪打奪解省人證復恃衆入城搜殺一次雖被殺由於報復死者亦非概屬無辜而受害情形實堪憫惻除業經盡絕之戶無可挽回外其有他出始歸以及藏匿逃亡遺存丁口悉經由官訪明捐貲撫卹以軫餘生至二十八年春間臣林則徐親往迤西督兵查辦於痛剿彌渡之後直擣七哨地方哨匪始懾軍威俯伏歸命當時拏獲辦罪至四百餘名之多七哨經此痛懲不敢復逞兇頑之習本擬招復逃亡回衆仍返故居惟查房屋被焚早成灰燼若令自行建蓋已屬力所未能且與漢民界址毘連清釐匪易一時既虞其弄衅日久更難以相安故於軍務將竣之時即另籌安置保回之地嗣據地方文武暨各委員覓得保山所轄距城二百餘里之官乃山一座周圍約十餘里外狹中寬前隔潞江後依雪山雪山之巔石崖陡險雖有獠獠夷人窩居其上向不與民人相通其自半山腰下至臨江間有平曠地土堪以墾種因而外來無業客民單身赴彼或種包穀雜糧或植大小果樹先搭棚寮棲止漸蓋土屋草房究因中隔潞江往來未能甚便該客民等仍不樂久居隨訪行有楊育春白奉禮等均願將自墾成熟之地暨果樹寮房悉行折價遷讓或以城鄉產業與之掉換亦所樂從當查該處山場既有田畝樹株按年可收花息并已種將熟之雜糧果實均願折價賣給回民到彼即無枵腹之虞若漸墾漸多更可長資養贍因詢保回頭人童俊劉耀宗等以保山之清真寺舊有星零公產其各鄉亦有故絕回戶遺產如願公同估價與官乃山產業房產互相掉換便可官為經理伊等當即允從其價值除互抵外尚有不敷由官湊捐給付遂將官乃山一座全作保回聚居之所除有他處親戚可依不願前往者聽其自便外凡願移之回戶皆按大小人口官給盤費經署保山縣知縣韓捧日署永昌協副將桂林等將該回民二百餘戶分起押送前往到後仍酌給三個月口糧俾得從容治產此上年安置保山回戶之情形也嗣又添撥把總一員先後帶兵八十名歸於原設之舊乃汛駐劄就近巡防該回民等益知官為保護得以久安生業陸續去者復有數起自係知為樂土彼此相招查該處去秋包穀雜糧均稱豐熟果樹亦皆獲利今年墾種之地比較去年更多將來戶口繁滋該山亦足資其力食與山巔之獠獠夷人及江外之上著漢民均無轆轤而保山城哨相距甚遙更無虞其生衅是回民安置在此似可決為久遠之圖雖不願者本不强其前來而已來者定可安於無事矣惟其祖先墳墓向來本在保山當二十五年互關之時回匪之燒漢屋者極多而漢匪之掘回墳者尤甚屍骸堆積令人不惡觀聞臣等面囑該府張亮基督屬妥為修掩張亮基到任後即與署保山縣陸葆捐發庫銀選擇公正紳省分赴各山將被掘回墳逐一修砌悉還其舊不獨屍骨全無遺棄并棺柩每與更新統計自夏至冬共修回墳九千餘家該處事定之後有回民赴保山祭掃者府縣派差照料即以暗杜衅端該回民見其墳冢新修比前加勝亦皆同聲感激并可消釋前嫌矣又據張亮基稟稱回戶保山中未經故絕之

人遺有田產上年軍務竣後曾經委員分路清查核與該回頭人查報大數相孚當即由官派佃代種收取租錢專覓外出各回民寄交該處地方官給領惟思回戶業經他徙若將零星田產留在保山內有狡黠之徒未忘舊弊即難保不藉此為由以清租為尋衅之地不如查起原契官為覓售其無原契者亦由官估價值分別變賣節經頭人傳諭業已允從者多惟聞有力之回本在他處經營貿易有不必急於變產而尚觀望遷延者若不催令一體辦理轉恐退有後言是以現仍傳覓本戶回民諄切曉諭令其出售零產以斷葛藤總期保邑漢回各遂其生永無可開之衅以仰副 聖主綏安邊圉一視同仁至意

致辰沅永靖道

胡林翼

楚粵匪徒寄居黔地勾煽頑苗聚積於烏沙雷公山老林深處經地方官密訪稟聞疊次圍剿陣斬外實已捕獲二百五十餘名刻下殘賊遁逃實不過數人查烏沙為清江台拱八寨丹江都江古州交界之地萬山叢錯八面甌脫雷公山為丹江台拱交界之地縣巨數百里林菁幽深係都鎮二府疆內均與楚地相隔甚遠未舉事之先林翼先將竄粵楚之路四面設防層層布置然後身領精練乘入其阻復經地方官四面協剿所獲極多實係地方官吏及紳民之功並非林翼之力荷蒙垂詢故敢直陳

招撫流亡示

瑞璋

照得衡山一島為海中棄地居民悉在化外光緒二年間蒙前撫憲楊衡念島民不忍化外棄之奏奉升糧編戶使爾等共為熙朝赤子本年又蒙撫憲梅札催應貢吏丞妥速辦竣亦係期望島民早日歸化由官保護大憲之恩可謂至高至厚該島共計十畧爾等九畧之人始終不為金匪所惑各能仰體恩意將田地一律報丈殊堪欣許至培陰崇金此爾一匪通盜有年魚肉鄉民亦非一日地方文武限於重洋僻遠不及周知又未據島民赴各衙門控訴昨據該匪逐一供明始悉平日惡跡不一而足已堪髮指查該匪有田二十餘畝按則升糧每年應完糧銀不過數錢為數甚少定欲蠱眾抗丈其意何居七月初九日定標員兵會同差役前往該畧掩捕該匪父子等胆敢率黨抗拒定兵中伏被挫經提督軍門及本道委員赴定查驗被殺之營弁二員兵丁數名遊擊守備千把受重傷者八員兵丁受傷至九十九名之多軍械洋槍號衣概被奪去可謂窮凶極惡猶不知自斂以悔禍乘標兵廳員回定之後復勾結黃阿四等黨糾合夏大金等悍匪具備大砲洋槍旗幟赴各畧搶掠勒索愈無忌憚致爾等流離失所九畧逃徙一空尤堪切齒七月二十二日奉大憲調撥水陸諸軍為爾等除害該匪竟先踞紫金山之險率黨來撲兵勇受槍子傷多名幸將士極力擊散生擒六十餘名奪獲大砲兩尊洋槍數十桿旗幟三十餘面二十

三日始將該匪金屹蘭搜獲二十四日獲到匪子金阿迷二十五日始將悍黨夏大金縛到該首要各負重傷經文武訊明將盜首黃四阿四等名及陣擒之劉大炮等七名正法金屹蘭一犯解由本道訊辦其餘五十餘名訊係被匪脅從取保開釋合島一律肅清惟查訪九畝居民當金匪猖獗之時荼毒不堪紛逃富波鎮海及岱山東沙角等處實堪憫惻除飭印委各員悉心撫循外為此示仰衢山流亡人等知悉現在該島巨禍已除地方安謐爾等各自攜家回島收地利以長子孫至升科之事爾等雖已欣然報丈尚未辦理妥貼本道業已專委廉明之員會同廳員迅速妥辦完竣如書役兵丁及各色人等敢有向爾等需索分文即赴印委各員并本道衙門指控立予重懲決不少貸爾等如前被金屹蘭勒詐出有洋票昨在該匪身邊搜獲數紙已經銷燬難保該匪不另有遺失或已用出嗣後如確係被詐之票不須再付分文敢有持票索討准爾等指控察辦

擬設法保護屯民夾片

光緒八年

吳大澂

再據統領綏字軍奏調直隸候補直隸州知州戴宗騫稟稱迭次出厯江北諸山周覽形勢博訪輿情知食力窮民奔走山中者不外捕貂砍木揀菜三宗未抵湯汪河北迤西北河數百里間山徑錯雜每歲不下千人所居有菜營木營碓房等名目多於正月間裹帶鹽糧雇馬馱負約敷一年之食節逾小雪始將皮張收齊陸續出山各起伐木之人則於冬令結伴前往砍足木料柴薪趁春夏水長時始行下放揀菜生計亦在夏秋三者皆流寓之民踐歷荒岩絕巘與鹿豕木石為羣既不便概絕其生路又無從究詰其由來雖非有富匪而積年馬賊倚險滋蔓暗恃此三項人之為接濟鹽糧買辦衣裝食物甚至子藥軍器亦能以重價為餌輾轉致之賊中在各項流民生業在山力不能與之抵抗稍有拂意即為所戕所得各種獸皮搜索過半欲易他業又無所資其謀生窘蹙情狀亦可矜矣地界既面面皆山易於數賊官兵所駐勢不能於嶺阻林荒之地處處分布若不設法於入口要隘處所酌撤哨隊分段填紮以資巡防而便稽察則目下即獲肅清難保異日兵撤不再萌芽茲擬於江北之永聚屯四塊石紅石礮大小胡同西北河石頭嘴等處江南之大小羅拉密花公雞等處各駐勇隊十餘人不占民屯專擇山內距口數十里必由之路暫借窩棚棲止傳諭各山溝捕獸砍樹揀菜人等各按所住山溝分起編號號寫明年歲籍貫及所置碓房木營菜營地段十人為一連環保如有外來游匪即挨號傳報不准窩留庶人跡罕到之深山窮谷亦各條分縷晰若網在綱如內地保甲之制俾異種不能攪入另繕名冊一分送三姓副都統衙門備案由營中遴派妥細員弁春秋兩季酌帶隊武挨號清查一次自攜口糧鹽菜不需各戶供給分毫庶山中食力之民既得所保護復互相糾察蓄盜藏奸之弊可不復滋等因稟請核辦前來臣查各山匪股甫經殄盡亟應籌辦善後事宜該統領所稟均係實情自應飭令派隊入山分布各口

與三姓練軍駐紮之地互相聯絡保護屯民於邊要地方不無裨益

請移駐巡檢分防疏

光緒八年

衛榮光

竊太湖所轄之東山下楊灣村為江浙通衢地方散漫並無一官駐守前據署太湖廳同知傅懷祖稟請派員駐紮藉以控制經臣飭司確查核議詳辦去後茲據蘇州布政使譚鈞培會同江蘇按察使許應鑄蘇松太道邵友濂詳稱太湖廳洞庭東西兩山分設東山角頭兩巡檢專司緝捕而東山周圍五十餘里四面皆湖又有前山後山之分該廳與東山司巡檢及太湖協副將守備均駐紮前山其後山相離廳治近者十里遠者三十里中間類多高山複嶺居民散而不聚或數十家或數百家巢棲山谷寄泊湖濱內下楊灣一村又係江浙往來水道通衢近成村市匪徒最易潛蹤民情亦屬强悍該處既無巡檢分防又無武官彈壓而離廳較遠一切巡緝稽查實有鞭長莫及之勢誠須派員擇要駐紮查向在前山之東山司巡檢因衙門自遭兵燹被燬貧民房搬移較易擬請移駐該村以資巡防飭據蘇州府查明並無窒礙由司詳請具奏前來臣伏查太湖廳所轄之洞庭東山孤峙湖中地方本極散漫該處後山之下楊灣村為江浙水道通衢匪徒最易潛蹤民情亦屬强悍自非駐紮一官不足以保衛閭閻今既據該司道等飭查明確所有東山司巡檢堪以移駐應請即將該巡檢分紮下楊灣村俾資巡緝而重地方謹會同大學士兩江總督臣左宗棠恭摺具奏

查明角子山地方險阻擬酌撥練軍駐紮毋庸改設通判疏

光緒十三年 河南巡撫邊寶泉

竊臣承准軍機大臣字寄光緒十一年十二月十八日奉 上諭有人奏豫省南汝之文積匪出沒請移營設官以資鎮撫一摺等因欽此當飭藩臬兩司轉行查議嗣據南陽汝甯兩府督同各州縣確查妥議稟司詳覆前來臣適赴南汝一帶查閱營伍復沿途親加密訪查角子山係泌陽轄境泌陽居其南舞陽居其北裕州居其西皆南陽府屬山之東北為西平正東為遂平東南為確山皆汝甯府屬山界六邑之間為衆山門戶蜿蜒二百餘里峰多徑雜民俗梗頑道光咸豐之際盜匪竄擾公然劫奪乘間肆掠聚散無定迨同治年間集兵剿洗醜類蕩平嗣迭經前撫臣飭地方官編查保甲會定章程令附州縣分班入山會哨從此官民相習閭閻安堵迄今雖民俗驟難丕變而匪徒斂戢耕鑿相安非復曩時之不靖矣惟該處地險山深藏奸最易自宜妥籌鎮撫防患未萌今議者以移置設官請自是正論第設官則須相度地勢造建衙署無論費繁工鉅籌款維艱且通判乃文職額設書役不過數十人置之羣山萬壑中坐鎮則無功緝捕則不足不若責成營汛認真巡緝較有實濟查角子山四圍向設沙河春水王店尹集平頭小史等汛第相距較遠兵勢亦單臣在南陽時已囑鎮臣楊芳桂就近酌派練軍數

哨在該山左近擇要駐紮無事則往來巡查有匪則協力兜拿營汛聯絡畛域不分務期謹行淨盡以仰副 聖主綏靖地方之至意至新設通判原駐新蔡息縣交界之地於黃湖店前因署燬於匪間或借差僑寓省城現若重建衙署委實無款可籌惟此職為捕盜廳員該處為東南門戶巡防責重未便任聽曠官擬飭在黃湖店僦居民屋所需租值在釐稅外銷項下籌節開支以重職守而節糜費

移設縣丞都司及建置事宜疏 光緒十四年

浙江巡撫 衛榮光

竊准吏部咨會議浙江巡撫劉東璵等奏請將永康縣縣丞改為永仙分防縣丞金華協中軍都司改為巡防都司移設八保山等因一摺於光緒十一年十一月十九日具奏奉 旨依議欽此黏抄原奏內開將原駐改駐地方情形詳細繪圖貼說並造具改駐分別管轄節制各員弁營制銜名清冊一併隨摺送部以憑查核覆奏到日再行核辦所有分防建置一切事宜應令該府等另行籌議辦理等因行文到浙當經轉飭遵辦去後茲據布政使許應鑾按察司蕭詒會詳據金華府知府陳文駢稟稱親至八保山相度山川采風問俗其地為永康縣管轄距縣治二百二十餘里民貧而瘠又與仙居縣壤地錯雜以至匪蹤據為淵藪良民被害難以呼訴現在分定地面會同台州府知府成邦幹確查妥議應以永康四十六七都仙居二十三四都地方歸縣丞專管遇有疏防盜案承緝不力處分即將縣丞開參其都司改駐營制又與金華協副將蕭尹農會議請將金華協中軍都司改駐八保山為巡防都司並將右營永康汛千總裏溪汛千總東陽縣城守汛把總夾溪白峯兩外委歸該都司管理該都司仍歸金華協節制毋庸更易營名並照撫標參將之例金華協不再另設中軍左右兩營公牘悉由兩營守備徑達副將核辦至左營守備原為都司中軍守備今相去較遠即刪去中軍字樣其撥歸都司節制之五汛本係右營汛地遇有大股台匪由都司就近調遣平時操防巡緝公文上下等事仍歸右營管理承緝開參之案亦仍照原制毋庸另議都司所駐八保山之桂川莊其山袤延永康縣四十六七都應即定為都司專管地面其仙居二十三四都仍以仙居潘灘汛外委為專汛各營各地不必更張都司所帶兵丁四十名遇有開補均由都司自主仍申報副將查核錢糧兵米概由副將札發無須再由守備管理以歸簡易並聲明縣丞衙門額設門子一名皂隸四名馬夫一名今改駐八保山責重事煩不敷差遣擬就永康仙居兩縣各撥壯役二名共壯役四名每年每名給工食銀六兩各移各縣給領都司衙門應給稿書一名清書一名亦在該營額設數內撥給建縣丞都司衙署經費由外籌辦不動正款所建基地由縣查明畝分另請豁糧除額等清由司核明具詳前來臣查永康縣八保山地方界於金台兩郡之間山深林密最易藏奸建置事宜分定地面扼要撫馭為第一關鍵既

經金華府知府陳文縣親詣履勘並與台州府金華協一再會議應請即以永康縣四十六七都仙居縣二十三四都撥歸移設之縣丞管理並以永康縣四十六七都為都司專管地面以專責成遇有疎防盜案分別照例開參金華協本無中軍同治八年始將左營都司改為中軍都司現因該都司移設八保山離郡較遠議請裁去中軍名目左營守備亦刪去都司中軍字樣擬歸都司節制之永康等五汛操防開參各仍舊制事歸簡便均應照辦其添撥壯役書識既不另請開銷建署所需經費亦不動支正項將來豁除糧額應由縣查明科則畝數另行專案詳辦以昭核實

皇朝經世文續編卷七十七

上海葛士濬子源輯

兵政十六 海防上

請改大鵬營制疏

林則徐

竊照廣東虎門海口為中路扼要之區於嘉慶十五年設立水師提督駐劄其地西則香山東則大鵬形成兩翼查香山協向駐副將管轄兩營額設弁兵一千七百零九員名兵力較厚大鵬原止一營額設參將一員管轄洋面四百餘里其中有孤懸之大嶼山廣袤一百六十餘里是以道光十年已將大鵬分為兩營而所設弁兵只九百九十八名員較之香山營制已有軒輊且所轄尖沙嘴洋面近年更為夷船聚泊之區該處山高水深風浪恬靜夷船倚為負隅之固上年調集官兵痛加勦擊始行全數退出恐兵撤之後仍復聯檣而來佔為巢穴當又相度形勢在尖沙嘴及官涌兩處添設礮臺一座現在工程將告竣已於另摺繕折奏報在案臣等復查尖沙嘴官涌兩處既經建設礮臺必須調兵防守但大鵬左營額設參將一員守備一員千總二員把總三員外委五員額外外委二員步守兵四百九十七名右營額設守備一員千總一員把總三員外委五員額外外委二員守兵四百七十五名除分班出洋外尚不足以敷巡守據該營縣會議請添經臣等與水師提督臣關天培再四籌商應將大鵬營改為協撥駐副將大員統帶督率與香山協聲勢相埒控制方為得力但官兵俸餉歲需支應國家經費有常未敢遽議增添惟有就通省各營設法抽撥并於水師名缺酌量改抵以歸簡易飭據司道核議會詳併咨准陸路提督臣郭 核覆前來臣等查外海水師副將共有四缺內除香山協應與大鵬分張兩翼毋容更議外其龍門一協地處邊陲與越南夷地緊連崖州一協係烟瘴之區且外臨大海內控黎人均為邊疆要地未便改抵惟澄海一協雖與閩省接壤而上接南澳下連潮州有水陸兩鎮為鄰尚屬易於聲援應將澄海協副將改為大鵬協副將移駐大鵬所轄扼要之九龍山地方居中調度其澄海協之都司改為大鵬協副將中軍都司兼管左營事務駐劄大鵬所城並於大鵬左營添設把總二員外委二員額外二員步戰守兵連新添外委額外名糧共二百九十一名大鵬右營添設千總一員把總一員外委二員額外二員步戰守兵連新添外委額外名糧共二百零九名以把總一員兵七十五名專防右營官涌礮臺以把總一員駐防九龍礮臺將原駐九龍礮臺之千總一員移防左營尖沙嘴礮臺俾帶新設額外外委一員兵丁一百三十名又以外委一員兵丁十五名戰守前經裁撤今應設回與尖沙嘴對峙之左營紅香爐汛又大鵬額設大小米艇六隻撈網船三隻分撥配巡不敷派

遣應設大中米艇四隻左右營各半以千總一員把總一員外委二員兵丁二百零四名配駕又添快船二隻以額外二員兵丁五十六名配駕其餘外委一員額外一員兵丁十二名隨防九龍聽候副將差遣所添員弁船隻先儘水師各營移撥應請在陽江鎮右營抽撥千總一員海門營抽撥把總一員外委一員龍門協左營抽撥外委一員龍門協右營抽撥外委一員陽江鎮右營抽撥太米艇一隻海安營抽撥太米艇一隻龍門協左營抽撥中米艇一隻海門營抽撥中米艇一隻又在龍門協右營抽撥繪繪船一隻歸入海安營配緝所需配船兵弁舵工口糧隨船移撥支給至議抽兵丁五百名水陸勻撥水師應抽兵丁二百五十名現在外海內河防堵巡緝在在需人若概於額設步守兵內抽撥未免顧此失彼應在水師提鎮協營酌量抽撥步兵三千七名守兵九十四名酌裁馬兵改補步兵一十名連撥外委本身步糧三名共得步兵五十名守兵九十四名尚需添補步兵二十五名守兵八十一名在水師各營馬糧較多營分將馬糧三十三名改為守步兵步糧較多營分將步糧一百六十四名改為守兵均各歸還原營兵額同馬兵所改步兵一十名遞年節存馬步糧料等項銀兩撥補增添步兵丁一百零六名歲需經費之用此外仍需把總二員外委一員步兵連外委本身名糧七十五名守兵一百七十五名應於督標五營及永靖營酌抽把總二名陸路提標五營酌抽外委一員其原食馬糧一分毋容隨撥併於陸路各營勻撥步兵七十五名守兵一百七十五名共兵二百五十名均歸大鵬入額其外委仍食本身步糧並在大鵬步兵數內添設額外外委四員仍支本身名糧以資差遣至澄海地方應將澄海協改為澄海營即將大鵬參將移駐作為澄海營參將澄海原有守備二員分為左右二營左營守備駐劄蓬州城所右營守備駐劄樟林所城均未便移改將大鵬左營守備改為澄海左營中軍守備駐劄縣城經管兩營錢糧其澄海左營守備改為左營左軍分防守備仍駐蓬州有營仍循其舊以資防守所以現改大鵬協副將都司乃澄海營參將左營中軍守備左營左軍分防守備俱照舊定為外海水師題補之缺其水陸各營抽撥兵丁所需糧餉公費紅白等項以及一切軍裝器械俱由各營撥出隨帶毋須另添澄海協改駐參將守備有原設副將都司衙署可以棲息辦公大鵬所城改設都司亦有守備原署可住其防守礮臺并兵即住礮臺均毋須另建衙署惟大鵬添設大快船二隻各營無可抽撥應另行製造計每隻需用裝造工料銀四百三十二兩二船共銀八百六十四兩歲需并兵口糧煙洗以及修費等項約需銀一千四百餘兩又九龍地方改駐副將紅香爐添設汛房應設衙署兵房以及大鵬新兵應製號衣器械等項所需經費均須預籌查有前山營生息一項從前係由洋商捐出本銀十萬兩發交當商生息以作設添前山營兵餉之用除每年支用外截至道光十九年五月底止實存銀五萬三千八百餘兩除另摺奏請動支添建尖沙嘴官涌兩礮臺工料共銀三

萬一千九百餘兩外所有此次添造快船及建造衙署製給新兵號衣器械等項用需均請於此項息銀內動支毋庸請動帑項如此改調添設因地制宜似於海疆控制大有裨益如蒙 俞允所有添造快船應建衙署兵房製給新添步守兵丁軍械等項臣等即飭令地方文武會同確估辦理其改設副將等官應行鑄換關防並一切營制抽撥細數及未盡事宜統容另行咨部核辦再前山營生息本銀係由洋商捐出與正雜錢糧不同每年止將收支實存數目報部查核今請動支此項息銀以作添造快船衙署製給軍械經費應俟動用後將支用總數於冊內開除造報免備造工料細冊報銷合併聲明

失沙嘴官涌添建礮臺疏

林則徐

竊照廣東水師大鵬營所轄洋面延袤四百餘里為夷船經由寄泊之區其失沙嘴一帶東北背負岡陵西則有急水門雞踏門東則有鯉魚門佛堂門而大嶼巨島又即在其西南四面環山藏風聚氣波平浪靜水勢寬深岬夷船隻久欲倚為巢穴而就粵省海道而論則凡東赴惠潮北往閩浙之船均不能不由該處經過萬一中途梗阻則為患非輕上年因英咄咄驚桀不馴抗違禁令經臣等與前督臣鄧廷楨調集官兵在失沙嘴迤北之官涌等處山梁紮營安礮分為五路痛加剿擊該夷兵船二隻貨船數十隻始皆連夜遁去但恐兵撤之後仍復連檣聚泊勢若負嵎必須扼要設防方足以資控制隨飭候補知府余保純署大鵬營參將賴恩爵新安縣知縣梁星源會同周歷履勘旋據該員等稟稱失沙嘴山麓一石有脚具其形方長直對夷船向來聚泊之所又官涌偏南一山前有石排一段天生磐固正對夷船南洋來路若兩處各建礮臺一座聲勢既相聯絡而控制亦極得宜等語當經飭令將兩臺高寬丈尺及開築地平並建造牆垛礮洞并署兵房神廟望樓藥局馬路一切工料價值核實確估據該員等呈送圖說清摺臣等逐一核身並委員詳細稽查凡有可以樽節之處復經酌量核減計失沙嘴礮臺估需工料銀一萬七千九百五十一兩零官涌礮臺估需工料銀一萬四千四十六兩零寔係省之又省必不能少竊思此項工程係屬防夷要務斷不可緩第 國家經費有常仍不敢請動 帑項臣等當與籌畫運司公同籌畫查有前山營生息一項係由洋商捐銀發交當商生息前於嘉慶十四年奏明作為添設前山營兵餉之用按年核實支銷已歷三十餘年之久因存有積併盈餘截至道光十九年五月底報部冊開寔存銀五萬三千八百餘兩除大鵬營現議更改營制所需添造快船建立衙署及製備新兵器械另捐請在此款動支外核其成數尚足以敷動撥前項礮臺工料之需合無仰懇 聖恩俯及礮臺工費為防夷所需而損款息銀與庫項有間 准於商息前山營生息一項銀兩動支兩座礮臺經費並請循照舊章將動用銀兩總數於冊內開除造報免造工料細冊報銷感荷 鴻慈倍無既極至此項工程因夷務吃緊之際先已購料興工

趕緊興築務於南風盛發夏令以前一律全完以資防制計兩臺應安大礮五十餘門亦已於腹地各營酌其緩急情形先行運撥濟用一面籌資購補期於普律森嚴以仰副聖主綏靖海疆之至意

覆奏查察虎門排練礮臺疏

林則徐

竊臣於三月初七日在虎門舟次承准軍機大臣字寄二月十六日奉 上諭據鄧廷楨等奏籌議虎門海口創造木排鐵線添置礮臺礮位一摺已降旨允准虎門海口為粵海中路咽喉現當籌議海口章程自宜妥為布置以密巡防該督等所請於海面安設木排鐵線以羈絆夷船並添設礮臺添置礮位之處是否有益著林則徐詳細查察情形據實具奏原摺著鈐給閱看將此諭令知之欽此伏查粵東中路海口以虎門為咽喉臣此次親至該夷處督收人鴉片即住在水師米艇寄校海中四夷形勢皆可瞭望當經留心相度竊見重門戶實屬險要天成自伶仃大洋過龍穴而北兩山斜峙東曰沙角西曰大角由此面入內洋是第一重門戶也進口七里有一山屹立中央名曰橫檔其前有以巨石俗名飯籬排又其前小山一座曰下橫檔海道至此分為二支其右一支有暗沙左一支以武山為岸武山亦謂之南山山前水深洋船出入皆由於此此第二重門戶也由橫檔山再進五里則為大虎山其西為小虎山再西則獅子洋即由黃浦以進省之路是大小虎山乃第三重門戶也此外如蕉門蘆灣山三門口新湧口等處港汊旁出島嶼週迴尚非夷船出入要津姑不具論以礮臺言之先有橫檔南山兩處均係康熙五十六年所建形勢稍狹嘉慶五年於沙角添建礮臺一座二十年後就橫檔礮臺加築月臺一座又於南山礮臺之西北添建鎮遠礮臺一座各安礮四十位二十三年又於大虎山建礮臺一座安礮三十二位道光十年大角山又添礮臺一座安礮十六位迨十四年冬間提臣關天培到粵適在驅逐夷人嘯嘯出口之後與前督臣盧坤商議以太用沙角兩礮臺中隔海面一千數百丈之多兩邊礮必均恐不能得力只宜作為望臺遇有應行防堵之時放礮報信其南山鎮遠與橫檔三處礮臺形如品字中隔水面三百餘丈礮火可期得力惟南山礮臺地勢過高礮子易於冒過船頂其餘原建牆垛亦俱單薄於道光十五年會摺奏 准將南山礮臺前面環築月臺名為威遠又將鎮遠橫檔大虎各礮臺加築堅固添鑄七八千斤大礮分別安配並於橫檔背面山麓及對面蘆灣山脚續添永安鞏固礮臺一座安礮四十位二十位不等此十五年以前陸續添設礮臺原委也維時提臣關天培即欲於橫檔山前海面較狹之處創造粗大鐵線安根兩岸鐵線之下承以木排木排兩端繫以鐵纜有事則橫絕中流無事則分投海岸如門開闔防堵益嚴以經費未充前督臣盧坤任內未及辦理鄧廷楨到後正與關天培商議籌辦旋於十八年夏間有啖咭喇國夷目嗎咭咭巡船三隻窺探虎門見海口布置森嚴畏懼竄去